

## LO DEVINAIRE

*Se coneissiatz mon oncle l'Anri d'en Móiran, sauriatz que n'i a pas un dins tot lo Sarlades, per menar, coma guel, la rega drecha al brut d'una canson. N'i a pas tant pauc que li fasque rampeu per far ni mais per dire qualqua brava zóana.*

*Jamais me seriày enmajenat que posquès i arribar só que me contet. Es de creire qu'endonc era pas tant degordit qu'aorá. Mes lo daissi parlar.*

— Qu'era à Sarlat, per la vóta al Pontet. Veniay d'atenjer mus 17 ans e ma paura maire, — que lo Bon Diu garde son ama, — m'avia crompat un cól à la móda d'endonc que m'escornhalava e me montava fissar las aurilhas. Podetz pensar coma marcavi! Me carravi tot parier, ma sór, la pus bela, m'avia fach la rega bien pel mitan, e tant i avia metut d'onjura que mus paures pials se tinian quilhats coma deus palfers. M'avia fach taben un brave noz de crebata emd una correja tota neya. Emd mas bragas que se replegavon tot quatre cóps suls talons, ma beloza redda de tant qu'era neva, i avia pas, pensi ben, pus crane marcamal dins tota la vóta.

Eri fier de ió; te jitavi d'aqueus cóps d'elhs à las dróllas... có davia luzir coma deus ilhauzes! Gueitavi virar lus chavals de bóy, perderi 10 sós and una lotaria sans poire ganhar'na sopiera emd un elh al fons: per dire, m'amuzavi bien, ane!

Tot emd un cóp te vau veire un crane mossur tot órdilhat de roje que te fazia un grand discors en brassejant:

— Les qui boudront apprène à debiner, fazia, ils ont qu'à dintrer, c'est mas l'affaire de deux ménutes, et bous sabez débiner pour toute la vite.

Eron tot un tropel de monde que l'escotavon. N'i avia que dintravon aprener, fasqueri parier.